

FORMULIER VIR DIE BEDIENING VAN DIE HEILIGE DOOP AAN KINDERS

Die hoofsaak van die leer van die heilige doop word in hierdie drie punte saamgevat:

Sonde

Eerstens: Ons en ons kinders is in sonde ontvang en gebore en is daarom onder die toorn van God, sodat ons nie in die koninkryk van God kan inkom nie¹, tensy ons opnuut gebore word². Dit word aan ons geleer deur die indompeling in en besprinkeling met die water, waardeur die onreinheid van ons siele vir ons aangetoon word. Ons word daardeur vermaan om 'n afkeer van onself te hê, ons voor God te verootmoedig en ons reiniging en saligheid buite onself te soek.

Verlossing

Tweedens: Die heilige doop betuig en verseël aan ons die afwassing van die sondes deur Jesus Christus³. Daarom word ons gedoop in die Naam van God: die Vader en die Seun en die Heilige Gees⁴.

~~Want~~ As ons in die Naam van die Vader gedoop word, betuig en verseël God die Vader aan ons dat Hy 'n ewige genadeverbond met ons sluit⁵, dat Hy ons tot sy kinders en erfgename aanneem en ons daarom met alle goeie dinge wil versorg en alle kwaad van ons wil afweer of tot ons beswil wil beskik.

~~En~~ As ons in die Naam van die Seun gedoop word, verseël die Seun aan ons dat Hy ons in sy bloed van al ons sondes afwas. Daarmee lyf Hy ons in die gemeenskap van sy dood en opstanding in. Hy doen dit só dat ons van ons sondes bevry en voor God regverdig gereken word.⁶

Net so ook, wanneer ons in die Naam van die Heilige Gees gedoop word, verseker die Heilige Gees ons deur hierdie heilige sakrament dat Hy in ons wil woon en ons tot lidmate van Christus wil heilig.⁷ Dit doen Hy deur tot ons eiendom te maak wat ons in Christus het, naamlik die afwassing van ons sondes en die daaglikse vernuwing van ons lewe, totdat ons uiteindelik onder die gemeente van die wat uitverkies is in die ewige lewe vlekkeloos gestel sal word⁸.

Dankbaarheid

Derdens: Omdat alle verbonde uit twee dele bestaan, daarom word ons ook weer deur God met die doop vermaan en verplig tot 'n nuwe gehoorsaamheid⁹. Ons moet naamlik hierdie enige God, Vader, Seun en Heilige Gees, aanhang, vertrou en liefhê met ons hele hart, met ons hele siel, met ons hele verstand en met al ons kragte¹⁰; ons moet van die wêreld afsien, ons ou natuur doodmaak en 'n lewe in volkome toewyding aan God lei. ~~En~~ As ons soms uit swakheid in sondes val, moet ons nie aan die genade van God twyfel of in die sondes bly lê nie. Die doop is immers 'n seël en ontwyfelbare getuienis dat ons 'n ewige verbond met God het.

¹ Romeine 3:9, 19; Romeine 5:12-21.

² Johannes 3:3.

³ 1 Korintiërs 6:11.

⁴ Matteus 28:19.

⁵ Genesis 17:7; Galasiërs 4:6-7.

⁶ 1 Korintiërs 1:30.

⁷ 1 Korintiërs 12:13.

⁸ Romeine 8:9, 15, 16.

⁹ Romeine 12:1-2.

¹⁰ Matteus 22:37-40.

Die kinderdoop

~~En~~ Hoewel ons kinders hierdie dinge nie verstaan nie, mag hulle nogtans nie daarom van die doop uitgesluit word nie, aangesien hulle sonder dat hulle dit weet, aan die verdoemenis in Adam deel het en ook, sonder dat hulle dit weet, weer in Christus tot genade aangeneem word. Net so spreek God tot Abraham, die vader van al die gelowiges, en daarom ook tot ons en ons kinders, wanneer Hy sê: *Ek sal my verbond oprig tussen My en jou en jou nageslag ná jou in hulle geslagte as 'n ewige verbond, om vir jou 'n God te wees en vir jou nageslag ná jou*¹¹. Dit ~~g~~betuig Petrus ook met hierdie woorde: *Want die belofte kom julle toe en julle kinders en almal wat daar ver is, die wat die Here ons God na Hom sal roep*¹². Daarom het God vroeër beveel dat hulle besny moet word, wat 'n seël van die verbond en van die geregtigheid van die geloof was. Net so het Christus hulle ook omhels, die hande opgelê en geseën¹³.

Omdat die doop nou in die plek van die besnydenis gekom het, moet die kinders as erfgename van die koninkryk van God en van sy verbond gedoop word¹⁴. ~~En~~ Die ouers is verplig om hulle kinders terwyl hulle opgroei, breedvoeriger hieroor te onderrig¹⁵.

Geliefde gemeente, ontvang hierdie kind / kinders as deel van die verbondsvolk van God en die liggaam van Christus. Wees lief vir hierdie kind/kinders, bid vir hom/haar/hulle, en wees 'n voorbeeld van 'n lewe in Christus.¹⁶

Om nou hierdie heilige instelling van God tot sy eer, tot ons troos en tot opbou van die gemeente uit te voer, laat ons daarom sy heilige Naam aanroep:

Gebed

O, almagtige, ewige God,

U het volgens u regverdige oordeel die ongelowige wêreld wat geen berou gehad het oor hulle sondes nie met die sondvloed gestraf en die gelowige Noag met sy gesin – slegs agt mense – deur u groot barmhartigheid gered en bewaar¹⁷. U het die verharde Farao met al sy manne in die Rooisee verdrink en u volk Israel op droë grond daardeur gelei – daardeur is die doop afgebeeld.

Ons bid U, op grond van u oneindige barmhartigheid, dat u hierdie kind/kinders van U in u genade wil aansien en deur u Heilige Gees in u Seun Jesus Christus wil inlyf, sodat hy/sy/hulle met Hom in sy dood begrawe mag word en met Hom in 'n nuwe lewe mag opstaan¹⁸. Ons bid U, laat hy sy / sy haar / hulle hulle kruis blymoedig dra,¹⁹ terwyl hulle Christus daagliks navolg en Hom aanhang met opregte geloof, vaste hoop en vurige liefde.²⁰ Laat hy/sy/hulle Christus navolg sodat hy/sy/hulle hierdie lewe, wat tog niks anders as 'n voortdurende sterwe is nie, deur U getroos, mag verlaat en op die laaste dag sonder verskrikking voor die regterstoel van Christus, u Seun, mag verskyn.

Dit bid ons deur Hom, ons Here Jesus Christus, u Seun, wat, saam met U en die Heilige Gees, één enige God, leef en regeer in ewigheid. Amen.

¹¹ Genesis 17:7.

¹² Handeling 2:39.

¹³ Markus 10:16.

¹⁴ Kolossense 2:11-12.

¹⁵ Psalm 78:3-4, Efesiërs 6:4.

¹⁶ Byvoeging Sinode 2009

¹⁷ 1 Petrus 3:20-21.

¹⁸ Romeine 6:4 ev.

¹⁹ Matteus 16:24.

²⁰ 1 Johannes 4:18; Ef 2:22-24; Rom 4:20,21; Ps 105:8.

Die doopouers moet nou op die volgende vrae antwoord:

Geliefdes in die Here Christus, U het gehoor dat die doop 'n instelling van God is om aan ons en ons kinders sy verbond te verseël. Daarom moet ons dit vir hierdie doel en nie uit gewoonte of bygelowigheid gebruik nie. Dat dit duidelik kan word dat dit u gesindheid is, moet u van u kant op hierdie vrae opreg antwoord:

Eerstens: Hoewel ons kinders in sondes ontvang en gebore en daarom aan allerhande ellende, ja, aan die verdoemenis self, onderwerp is, bely u nogtans dat hulle in Christus geheilig is en daarom as lidmate van sy gemeente gedoop behoort te wees?

Tweedens: Bely u dat die leer wat in die Ou en Nuwe Testament en in die Artikels van die Christelike geloof vervat is en in die Christelike kerk hier geleer word, die ware en volkome leer van die saligheid is?

Derdens: Belowe u en neem u u voor om hierdie kind/kinders, van wie u die vader en/of moeder is, wanneer hy (sy/hulle) dit kan verstaan, in die genoemde leer na u vermoë te onderrig en te laat onderrig.

Antwoord: Ja.

Daarna sê die dienaar as hy die doop bedien, die volgende:

Doop

N, ek doop u/jou in die Naam van die Vader en die Seun en die Heilige Gees.

Dankgebed

Almagtige, barmhartige God en Vader, U het ons en ons kinders al ons sondes deur die bloed van u geliefde Seun, Jesus Christus vergewe; U het ons deur u Heilige Gees as lidmate van u eniggebore Seun en só as u kinders aangeneem; U bevestig en bekragtig dit alles met die doop – daarvoor dank en loof ons U.

Ons bid U ook deur Hom, u geliefde Seun, dat U hierdie kind/kinders altyd met u Heilige Gees wil regeer, sodat hy/sy/hulle Christelik en in volle toewyding aan U opgevoed mag word en in die Here Jesus Christus mag groei en toeneem.²¹ Laat hy/sy/hulle so u vaderlike goedheid en barmhartigheid, wat U aan hom/haar/hulle en ons almal bewys het, bely en in alle geregtigheid onder ons enigste Leraar, Koning en Hoëpriester, Jesus Christus, lewe en moedig teen die sonde, die duiwel en sy hele ryk stry en oorwin.²² Wil U dit gee sodat hy/sy/hulle U en u Seun Jesus Christus, en ook die Heilige Gees, die enigste ware God, ewig sal loof en prys.

Amen.

FORMULIER VIR DIE VIERING VAN DIE HEILIGE NAGMAAL

Geliefdes in die Here Jesus Christus,

Instelling

Luister na die instellingswoorde van die heilige nagmaal van ons Here Jesus Christus soos die apostel Paulus dit vir ons beskrywe in die eerste Korintiërbrief²³:

“Ek het van die Here ontvang wat ek ook aan julle oorgelewer het, dat die Here Jesus in die nag waarin Hy verraai is, brood geneem het; en nadat Hy gedank het, het Hy dit gebreek en

²¹ Efesiërs 4:16-17.

²² Efesiërs 6:10-13.

²³ 1 Korintiërs 11:23-29.

gesê: *Neem, eet; dit is my liggaam wat vir julle gebreek word; doen dit tot my gedagtenis. Net so ook die beker na die ete, met die woorde: Hierdie beker is die nuwe testament in my bloed; doen dit, so dikwels as julle daaruit drink, tot my gedagtenis. Want so dikwels as julle hierdie brood eet en hierdie beker drink, verkondig julle die dood van die Here totdat Hy kom. Wie dan op onwaardige wyse hierdie brood eet of die beker van die Here drink, sal skuldig wees aan die liggaam en bloed van die Here. Maar die mens moet homself beproef en so van die brood eet en uit die beker drink. Want wie op onwaardige wyse eet en drink, eet en drink 'n oordeel oor homself, terwyl hy die liggaam van die Here nie onderskei nie.*"

Om nou tot ons troos die nagmaal van die Here te kan hou, is dit eerstens nodig dat ons ons vooraf reg sal ondersoek en tweedens, dat ons dit sal hou volgens die doel waartoe die Here Christus dit bepaal en ingestel het, naamlik tot sy gedagtenis.

Selfondersoek

Die ware selfondersoek bevat hierdie drie hoofpunte:

Eerstens: Elkeen moet persoonlik nadink oor sy sonde en vervloeking, sodat hy homself kan verag en hom voor God kan verootmoedig; want die toorn van God teen die sonde is so groot dat Hy dit, eerder as om dit ongestraf te laat bly, aan sy geliefde Seun, Jesus Christus, met die bitter en skandelijke kruisdood gestraf het.

Tweedens: Elkeen moet sy hart ondersoek of hy die vaste belofte van God glo dat al sy sondes alleen op grond van die lyding en dood van Jesus Christus vergewe is; ook of hy glo dat die volmaakte geregtigheid van Christus hom as sy eie toegereken en geskenk is – so volkome asof hy persoonlik vir al sy sondes betaal en alle geregtigheid volbring het.

Derdens: Elkeen moet sy gewete ondersoek of hy van voorneme is om van nou af met sy hele lewe ware dankbaarheid aan God te betoon en opreg voor Hom te wandel; net so ook, terwyl hy alle vyandskap, haat en nyd laat vaar, om eerlik 'n ernstige voorneme te hê om van nou af in ware liefde en eensgesindheid met sy naaste te lewe.

Almal wat so gesind is, wil God beslis in genade aanneem en as waardige tafelgenote van sy Seun, Jesus Christus, beskou. ~~Maar~~ Hulle wat egter, aan die ander kant, hierdie getuienis nie in hulle hart ondervind nie, eet en drink 'n oordeel oor hulleself. Volgens die bevel van Christus en van die apostel Paulus vermaan ons dan ook almal wat weet dat hulle met die volgende aanstootlike sondes besmet is, om hulle van die tafel van die Here te onthou. Ons verkondig ook aan hulle dat hulle geen deel aan die koninkryk van Christus het nie: alle afgodsdienaars; almal wat afgestorwe heiliges, engele of ander geskape dinge aanroep, en dié wat beelde vereer; alle towenaars en waarsêers wat diere of mense of ander dinge besweer en die wat aan so 'n beswering glo; alle veragters van God en sy Woord en die heilige sakramente; alle Godslasteraars; almal wat skeuring, partyskappe en oproer in kerk en staat wil veroorsaak; almal wat vals sweer²⁴ en wat hulle ouers en owerhede ongehoorsaam is; alle moordenaars en twissoekers en dié wat in haat en nyd teenoor hulle naaste lewe²⁵ ~~[Matt 5:43 ev]~~; alle egbrekers, onsedelikes, dronkaards, diewe, onwettige winsmakers, rowers, dobbelaars, gierigaards, kwaadpraters²⁶ ~~[vgl 1 Kor 5:11]~~ en almal wat aanstootlik lewe²⁷. Hulle almal moet, solank hulle in sulke sondes volhard, hulle van hierdie voeding onthou, wat Christus alleen vir sy gelowiges ingestel het, sodat hulle oordeel en verdoemenis nie nog swaarder word nie.

~~Maar~~, Geliefde broers en susters in die Here, die bedoeling is egter nie om die verslae harte van die gelowiges mismooedig te maak nie, asof niemand na die nagmaal van die Here mag

²⁴ Levitikus 19:12.

²⁵ ~~[Matt 5:43 ev]~~

²⁶ ~~[vgl 1 Kor 5:11]~~

²⁷ 1 Korintiërs 5:11, Efesiërs 5:5, Eksodus 20:12-17, Sagaria 8:17.

gaan nie, behalwe die wat sonder enige sonde is. Ons kom daarom dan nie na die nagmaal om daarmee te kenne te gee dat ons self volmaak en regverdig is nie. Inteendeel, aangesien ons juis ons lewe buite ons self in Christus soek, erken ons daarmee dat ons midde in die dood lê. Dit is wel so dat ons nog baie ellende en gebreke in onself vind, naamlik dat ons nie 'n volmaakte geloof het nie; dat ons God ook nie met so 'n ywer dien as wat ons verskuldig is nie; dat ons daagliks moet stry teen die swakheid van ons geloof en die bose begeertes van ons vlees. Waar ons egter deur die genade van die Heilige Gees oor sulke gebreke hartgrondig berou het en begeer om teen ons ongeloof te stry en om volgens al die gebooie van God te lewe, sal ons daarvan heeltemal seker wees dat geen sonde of swakheid wat teen ons wil in ons oorgebly het, kan verhinder dat God ons in genade sou aanneem en ons so waardig maak om deel te hê aan hierdie hemelse voedsel en drank nie.

Gedagtenis

Laat ons nou verder oordink vir watter doel die Here vir ons sy nagmaal ingestel het, naamlik dat ons dit tot sy gedagtenis moet gebruik. Dit beteken dat ons Hom daarmee soos volg moet gedenk:

Eerstens dat ons van harte moet vertrou dat ons Here Jesus Christus – volgens die beloftes wat van die begin af aan die aartsvaders in die Ou Testament gegee is – deur die Vader na hierdie wêreld gestuur is. Ons moet vertrou dat Hy ons vlees en bloed aangeneem het en die toorn van God, waaronder ons ewig moes ondergegaan het, van die begin van sy menswording af tot aan die einde van sy lewe op aarde vir ons gedra het. Ons moet vertrou dat Hy in alle gehoorsaamheid en geregtigheid die wet van God vir ons vervul het, veral toe die las van ons sonde en van die toorn van God Hom in die tuin [van Getsémané] bloed laat sweet het,²⁸ waar Hy gebind is om ons te ontbind. Daarna het Hy ontsaglike veragting gely²⁹ [~~Jes 53:3~~], sodat ons nooit meer 'n voorwerp van skande sou word nie. Ons moet vertrou dat Hy onskuldig tot die dood veroordeel is, sodat ons voor die gerig van God vrygespreek sou word; ja, ons moet vertrou dat Hy sy geseënde liggaam aan die kruis laat spyker het om die skuldbrief van ons sonde³⁰ daaraan vas te spyker en dat Hy só die las van ons vervloeking op Hom geneem het om ons met sy seën te oorlaai. Ons moet vertrou dat Hy Hom aan die kruishout, na liggaam en siel, tot in die allerdiepste smaad en angs van die hel verneder het, toe Hy hard uitgeroep het: *My God, my God, waarom het U My verlaat?*³¹ – sodat ons deur God aangeneem en nooit meer deur Hom verlaat sou word nie; ons moet vertrou dat Hy uiteindelik met sy dood en die stort van sy bloed die nuwe en ewige testament, die verbond van genade en versoening, bekragtig het toe Hy gesê het: *Dit is volbring*³².

Om vas te glo dat ons deel het aan hierdie genadeverbond, het die *Here Jesus toe Hy die nagmaal ingestel het, die brood geneem, en nadat Hy gedank het, het Hy dit gebreek, aan sy dissipels gegee en gesê: Neem, eet; dit is my liggaam wat vir julle gebreek word; doen dit tot my gedagtenis. Net so het Hy na die ete die beker geneem, en nadat Hy gedank het, het Hy dit aan hulle gegee en gesê: Drink almal daaruit; hierdie beker is die nuwe testament in my bloed wat vir julle en vir baie uitgestort word tot vergifnis van sondes. Doen dit, so dikwels as julle daaruit drink, tot my gedagtenis*³³ [~~Matt 26:26-28; Luk 22:19,20~~]. Dit wil sê, so dikwels as wat julle van hierdie brood eet en uit hierdie beker drink, sal julle daardeur, soos in die geval van 'n vaste herinnering en waarborg, bemoedig word deur en verseker word van hierdie hartlike liefde en trou van My teenoor julle. Dit blyk daaruit dat Ek vir julle, wat anders die ewige dood moes sterwe, my liggaam aan die kruishout in die dood gee en my bloed vergiet en julle hongerige en dorstige harte met my gekruisigde liggaam en uitgestorte bloed tot die ewige lewe voed en verkwik. Julle word hiervan verseker deur die

²⁸ Lukas 22:44.

²⁹ [~~Jes 53:3~~]

³⁰ Kolossense 2:14.

³¹ Matteus 27:46, Markus 15:34; Ps 22:2.

³² Johannes 19:30.

³³ [~~Matt 26:26-28; Luk 22:19,20~~]

brood wat voor elkeen se oë gebreek word, die beker wat aan elkeen gegee word, en die feit dat julle dit tot my gedagtenis met die mond eet en drink³⁴.³⁵ [NGB, art 35.]

Uit hierdie instelling van die heilige nagmaal van ons Here Jesus Christus sien ons dat Hy ons geloof en vertrouwe op sy volkome offer rig, wat eenmaal aan die kruis volbring is, as die enigste grondslag en fondament van ons saligheid. Deur sy volkome offer het Hy die ware voedsel en drank van die ewige lewe vir ons honger en dors harte geword. Deur sy dood het Hy immers die oorsaak van ons ewige honger en kommer, naamlik die sonde, weggeneem. Hy het vir ons die lewendmakende Gees verwerf, sodat ons deur die Gees – wat in Christus as die Hoof en in ons as sy ledemate woon – ware gemeenskap met Hom sal hê en aan al sy rykdom, die ewige lewe, geregtigheid en heerlikheid deel sal kry.

Verder word ons ook deur dieselfde Gees [van Christus] onderling as ledemate van een liggaam in ware broederlike liefde saamgebind, soos die apostel sê: Omdat dit een brood is, is ons almal een liggaam, want ons het almal deel aan die een brood³⁶. Net soos uit baie graankorrels een meel gemaal en een brood gebak word en uit baie druiwekorrels, as hulle gepars word, een wyn en drank vloei en in een vermeng word, so moet ons almal wat deur die geloof ingelyf is in Christus, één liggaam wees. Ons, wat deur die geloof ingelyf is in Christus, moet deur broederlike liefde, ter wille van ons geliefde Saligmaker, wat ons eerste liefgehad het, een liggaam wees en dit nie alleen met woorde nie maar ook met die daad teenoor mekaar bewys.

Mag die almagtige, barmhartige God en Vader van ons Here Jesus Christus deur sy Heilige Gees ons daartoe help. Amen.

Laat ons nou, om dit alles te verkry, ons voor God verootmoedig en Hom met waaragtige geloof om sy genade aanroep:

Gebed

Barmhartige God en Vader,

In hierdie nagmaal herdenk ons in ons amptelike samekoms die heerlike gebeurtenis van die bittere dood van u geliefde Seun, Jesus Christus. Ons bid U dat U deur u Heilige Gees dit in ons harte sal bewerk dat ons ons in opregte vertrouwe al meer aan u Seun oorgee. Wil U dit doen sodat ons terneergedrukte en verslae harte met sy ware liggaam en bloed, ja, met Hom, waaragtige God en mens, die enige hemelse brood, deur die krag van die Heilige Gees gevoed en verkwik word. ~~En~~ Wil U gee dat ons nie meer in ons sondes lewe nie maar Hy in ons en ons in Hom. Laat ons so waarlik deel hê aan die nuwe en ewige testament en verbond van genade, sodat ons nie twyfel dat U vir ewig ons genadige Vader is wat nooit weer ons ons sondes toereken nie en ons as u geliefde kinders en erfgename na liggaam en siel met alle dinge versorg.

Gee ons ook u genade om, terwyl ons getroos ons kruis opneem, onself te verloën, ons Heiland te bely en in alle droefheid met gespanne afwagting ons Here Jesus Christus uit die hemel te verwag, wanneer Hy ons sterflike liggame aan sy verheerlikte liggaam gelyk sal maak en ons tot in ewigheid by Hom sal neem. Verhoor ons, o God en barmhartige Vader, deur Jesus Christus, wat ons geleer het om so te bid:

*Ons Vader wat in die hemele is,
laat u Naam geheilig word,
laat u koninkryk kom,*

³⁴ 1 Korintiërs 11:23-25.

³⁵ [NGB, art 35.]

³⁶ 1 Korintiërs 10:17.

*laat u wil geskied, soos in die hemel net so ook op die aarde.
Gee ons vandag ons daaglikse brood en vergewe ons ons skulde,
soos ons ook ons skuldenaars vergewe;
en lei ons nie in versoeking nie, maar verlos ons van die Bose.
Want aan U behoort die koninkryk en die krag en die heerlikheid tot in ewigheid.³⁷
Amen.*

Hartverheffing

*Daarna sê die bedienaar van die Woord: **Hartverheffing***

Om dan nou met die ware hemelse brood, Christus, gevoed te word moet ons nie met ons harte aan die sigbare tekens van brood en wyn bly vashou nie, maar ons harte ophef na die hemel, waar Jesus Christus ons Voorspraak aan die regterhand van sy hemelse Vader is³⁸ [1-Joh 2:1], waarna die Artikels van ons Christelike geloof ons ook heenwys. Laat ons terselfdertyd ook nie daaraan twyfel nie dat ons lewe net so werklik deur die werking van die Heilige Gees met sy liggaam en bloed gevoed en verkwik word³⁹ [HK, So 28, vr 75] as wat ons die brood en drank tot sy gedagtenis ontvang.

As die brood gebreek en uitgedeel word, sê die bedienaar:

Die brood wat ons breek, is die gemeenskap met die liggaam van Christus. Neem, eet, gedenk en glo dat die liggaam van ons Here Jesus Christus gebreek is tot 'n volkome versoening van al ons sondes.

En as hy die beker aangee:

Die beker van danksegging waarvoor ons God dank⁴⁰ [1 Kor 10:16], is die gemeenskap met die bloed van Christus. Neem, drink almal daaruit; gedenk en glo dat die kosbare bloed van ons Here Jesus Christus vergiet is tot 'n volkome versoening van al ons sondes.

Na die bediening sê die bedienaar:

Lofverheffing

Geliefdes in die Here, aangesien die Here ons siele nou aan sy tafel gevoed het, laat ons almal saam sy Naam met dankbaarheid prys en in ons hart soos volg sê:

Loof die HERE, o my siel, en alles wat binne-in my is, sy heilige Naam! Loof die HERE, o my siel, en vergeet geeneen van sy weldade nie! Wat al jou ongeregtigheid vergewe, wat al jou krankhede genees, wat jou lewe verlos van die verderf, wat jou kroon met goedertierenheid en barmhartighede. Barmhartig en genadig is die HERE, lankmoedig en groot van goedertierenheid. Hy sal nie vir altyd twis en nie vir ewig die toorn behou nie. Hy handel met ons nie na ons sondes en vergeld ons nie na ons ongeregtighede nie. Want so hoog as die hemel is bo die aarde, so geweldig is sy goedertierenheid oor die wat Hom vrees. So ver as die ooste verwyderd is van die weste, so ver verwyder Hy ons oortredinge van ons. Soos 'n vader hom ontferm oor die kinders, so ontferm die HERE Hom oor die wat Hom vrees⁴¹.

Hy het selfs sy eie Seun nie gespaar nie maar Hom vir ons almal oorgegee en ons alles genadiglik met Hom geskenk⁴². Aangesien God reeds sy liefde vir ons daarin bewys het dat Christus vir ons gesterf het toe ons nog sondaars was, soveel te meer sal ons deur Hom van sy toorn gered word nou dat ons in sy bloed geregverdig is. As ons, terwyl ons nog vyande was, met God versoen is deur die dood van sy Seun, hoeveel te meer sal ons deur sy lewe

³⁷ Matteus 6:9-13.

³⁸ [1 Joh 2:1]

³⁹ [HK, So 28, vr 75]

⁴⁰ [1 Kor 10:16]

⁴¹ Psalm 103:1-4, 8-13.

⁴² Romeine 8:32.

gered word nou dat ons met Hom versoen is⁴³. Daarom sal my mond en hart die lof van die Here verkondig van nou af tot in ewigheid. Amen.

Gebed

O barmhartige God en Vader, Ons dank U met ons hele hart dat U uit oneindige barmhartigheid u eniggebore Seun aan ons as 'n Middelaar en offer vir ons sondes en as 'n spys en drank van die ewige lewe geskenk het. Ons dank U ook dat U ons 'n ware geloof gee, waardeur ons hierdie weldade deelagtig word. Ons dank U dat U tot versterking van die geloof vir ons die nagmaal laat instel en verorden het. Ons bid U, getroue God en Vader, dat U deur die werking van u Heilige Gees die gedagtenis van ons Here Jesus Christus en die verkondiging van sy dood bevorderlik wil laat wees vir ons daaglikse vooruitgang in die regte geloof en in die salige gemeenskap van Christus. Dit bid ons deur Hom, u geliefde Seun, Jesus Christus. Amen.

VERKORTE FORMULIER VIR DIE VIERING VAN DIE HEILIGE NAGMAAL

Geliefdes in die Here Jesus Christus

Instelling

Luister na die instellingswoorde van die heilige nagmaal van ons Here Jesus Christus soos Paulus dit beskryf:

"Ek het van die Here ontvang wat ek ook aan julle oorgelewer het, dat die Here Jesus in die nag waarin Hy verraai is, brood geneem het; en nadat Hy gedank het, het Hy dit gebreek en gesê: Neem, eet; dit is my liggaam wat vir julle gebreek word; doen dit tot my gedagtenis. Net so ook die beker na die ete, met die woorde: Hierdie beker is die nuwe testament in my bloed; doen dit, so dikwels as julle daaruit drink, tot my gedagtenis. Want so dikwels as julle hierdie brood eet en hierdie beker drink, verkondig julle die dood van die Here totdat Hy kom. Wie dan op onwaardige wyse hierdie brood eet of die beker van die Here drink, sal skuldig wees aan die liggaam en bloed van die Here. Maar die mens moet homself beproef en so van die brood eet en uit die beker drink."

Om nou tot ons troos die nagmaal reg te vier, is dit nodig om onself vooraf reg te ondersoek en dit tot sy gedagtenis te gebruik.

Selfondersoek

Die ware selfondersoek bevat hierdie drie hoofpunte:

Eerstens: ons moet nadink oor ons sonde en vervloeking en ons met diep berou hieroor voor God verootmoedig.

Tweedens: ons moet die vaste belofte van God glo dat al ons sondes alleen op grond van die soenverdienste van Christus vergewe is en dat sy volmaakte geregtigheid ons toegereken en geskenk is.

Derdens: ons moet die opregte begeerte hê om met ons hele lewe dankbaarheid aan God te betoon, opreg voor Hom te wandel en in ware liefde en eensgesindheid met ons naaste te lewe.

Almal wat só gesind is, wil God in genade aanneem en in die seëninge van die nagmaal laat deel. ~~Maar~~ Hulle wat egter hardnekkig en sonder berou God se gebod oortree, eet en drink 'n oordeel oor hulleself. Daarom verkondig ons aan alle afgodsdienaars, towenaars en waarsêers en dié wat aan hulle glo, godslasteraars en skeurmakers in kerk en staat, dié wat

⁴³ Romeine 5:8-10.

meineed pleeg, ongehoorsames, moordenaars en twissoekers, egbrekers, onsedelikes, dronkaards, diewe, rowers, dobbelaars en gierigaards om nie na die nagmaal te kom nie. ~~Want~~ Niemand wat liefdeloos en aanstootlik lewe, het deel aan die koninkryk van Christus nie. Tog kom ons nie na die nagmaal omdat ons dink dat ons sondeloos en volmaak is nie. Inteendeel, ons kom juis omdat ons ons lewe buite ons self in Christus soek. Daarmee erken ons dat ons van nature deur die sonde dood is. Ons het inderdaad nog baie gebreke: gebrek aan geloof, aan ywer in God se diens, aan liefde tot God en ons naaste. Ons het egter deur die genade van die Heilige Gees hartgrondig berou oor ons sondes en begeer opreg om volgens al die gebooe van God te lewe. Daarom kan ons seker wees dat God ons in genade aanneem en waardig maak om deel te hê aan die hemelse voedsel en drank.

Gedagtenis

Die Here leer ons die doel van die nagmaal wanneer Hy sê: *Doen dit tot my gedagtenis*. Om dit te doen moet ons opreg glo dat Hy deur die Vader na hierdie wêreld gestuur is, dat Hy ware mens geword het en as sondelose Lam die toorn van God gedurende sy hele lewe op aarde vir ons gedra het. Hy het met volmaakte gehoorsaamheid God se wet vir ons vervul. Hy het vir ons veragting gely, sodat ons nooit weer 'n voorwerp van skande sou word nie. Hy is onskuldig tot die dood veroordeel, sodat ons voor die gerig van God vrygespreek kan word. Hy is aan die kruis gespyker om die skuldbrief van ons sondes daaraan vas te spyker. So het Hy ons vervloeking op Hom geneem om ons met sy seën te oorlaai. Hy het pyn en smart en bange Godverlatenheid gely toe Hy uitgeroep het: *My God, my God, waarom het U My verlaat?*⁴⁴ sodat ons nooit meer deur God verlaat sou word nie. Eindelik het Hy met sy dood en die stort van sy bloed die ewige genadeverbond vervul met die woorde: *Dit is volbring.*⁴⁵

Wanneer ons so aan Hom dink, word die tekens van brood en wyn elke keer weer 'n versekering dat Hy Hom in ons plek oorgegee het en dat Hy ons só seker met sy liggaam en bloed voed as wat ons die brood eet en drink. So wil die lewende Christus deur sy Gees ons van sy liefde verseker en ons tot die vaste wete bring dat ons ook tot hierdie genadeverbond behoort. Daarom laat die fees van die nagmaal ons ook met groot verlange uitsien na die bruilofsmaal van die Lam.

So leer die nagmaal ons om die enige kruisoffer van ons Here Jesus Christus as die enigste grondslag van ons saligheid in die geloof te omhels. Daar is sy liggaam gebreek en sy bloed vergiet tot 'n volkome versoening van al ons sondes en het Hy vir ons die ware voedsel en drank van die ewige lewe geword. Deur sy dood het Hy vir ons die lewendmakende Gees verwerf, wat ons aan Christus in ware gemeenskap verbind en in al sy rykdom laat deel. Dieselfde Gees bind ons ook as ledemate van één liggaam in ware liefde saam. Omdat ons almal aan die een brood deel het, is ons almal een liggaam. Daarom moet ons almal wat deur die geloof in Christus ingelyf is, hierdie eenheid in liefde met woord en daad teenoor mekaar bewys. Mag God deur sy Gees ons daartoe help. Amen.

Gebed

Laat ons ons nou eers voor God verootmoedig en Hom gelowig om sy genade aanroep:
Barmhartige God en Vader

Ons dank U dat ons die troosryke gebeurtenis van u Seun, Jesus Christus, se bitter dood mag gedenk. Ons bid U, gee dat u Heilige Gees dit in ons harte sal bewerk dat ons ons in opregte vertrouwe al meer aan u Seun oorgee, sodat ons met Hom, die hemelse brood, gevoed word en dat ons nie meer in ons sondes nie maar in Hom mag lewe. Help ons om onself te verloën, ons Heiland te bely en met gespanne afwagting te wag op sy terugkoms,

⁴⁴ Matteus 27:46, Markus 15:34; Ps 22:2.

⁴⁵ Johannes 19:30.

wanneer Hy ons in ewigheid by Hom sal neem. Verhoor ons, o God en barmhartige Vader, om Jesus ontwil. Amen.

Hierna volg 'n toepaslike psalm. Die dienaar gaan na die tafel en sê:

Hartverheffing

Verhef u harte na Jesus Christus, ons Voorspraak aan die regterhand van die hemelse Vader, en wees verseker dat die Heilige Gees u net so seker met Jesus se liggaam en bloed versterk as wat u die tekens van brood en wyn tot sy gedagtenis ontvang.

Formule

Die brood wat ons breek, is die gemeenskap met die liggaam van Christus. Neem, eet, gedenk en glo dat die liggaam van ons Here Jesus Christus gebreek is tot 'n volkome versoening van al ons sondes. Die beker van danksegging waarvoor ons God dank, is die gemeenskap met die bloed van Christus. Neem, drink almal daaruit; gedenk en glo dat die kosbare bloed van ons Here Jesus Christus vergiet is tot 'n volkome versoening van al ons sondes.

Lofverheffing

Geliefdes, omdat die Here ons met die hemelse brood gevoed het, laat ons almal saam met dankbaarheid sy Naam loof en prys met die volgende woorde:

Loof die HERE, o my siel, en alles wat binne-in my is, sy heilige Naam! Loof die HERE, o my siel, en vergeet geeneen van sy weldade nie! Wat al jou ongeregtigheid vergewe, wat al jou krankhede genees, wat jou lewe verlos van die verderf, wat jou kroon met goedertierenheid en barmhartighede. Barmhartig en genadig is die HERE, lankmoedig en groot van goedertierenheid. Hy sal nie vir altyd twis en nie vir ewig die toorn behou nie. Hy handel met ons nie na ons sondes en vergeld ons nie na ons ongeregtighede nie. Want so hoog as die hemel is bo die aarde, so geweldig is sy goedertierenheid oor die wat Hom vrees. So ver as die ooste verwyderd is van die weste, so ver verwyder Hy ons oortredinge van ons. Soos 'n vader hom ontferm oor die kinders, so ontferm die HERE Hom oor die wat Hom vrees⁴⁶.

Daarom sal my mond en hart die lof van die Here verkondig van nou af tot in ewigheid. Amen.

Dankgebed

Barmhartige God en Vader,

Ons dank en loof U dat U die heerlike beloftes van die evangelie met hierdie nagmaal aan ons bevestig. Ons dank U dat U u eniggebore Seun gegee het as Middelaar en offer vir ons sondes. Ons dank U vir die ware geloof, waardeur ons deel kry aan die offer van u Seun. Ons bid U, laat deur die werking van u Heilige Gees die verkondiging van die dood van ons Here ons daagliks laat groei in die geloof en in die heerlike gemeenskap met Christus, om sy Naam ontwil. Amen.

FORMULIER VIR DIE BEDIENING VAN DIE HEILIGE DOOP AAN VOLWASSENES

[Wanneer persone wat as kinders – weens verskillende redes, bv. nalatigheid of dwaling van hulle ouers – nie gedoop is nie, intussen tot begrip gekom het en begeer om die Christelike doop te ontvang, moet hulle eers goed in die grondslae van die Christelike godsdiens onderrig word. ~~En~~—As hulle daarvan (voor die kerkraad of verteenwoordigers van die

⁴⁶ Psalm 103:1-4, 8-13.

kerkraad of openlik – al na gelang dit in elke kerk as die opbouendste geag word) 'n goeie belydenis gedoen het, moet hulle tot die heilige doop toegelaat word. In die bediening daarvan moet hierdie formulier gebruik word.]

Die hoofsaak van die leer van die heilige doop word in hierdie drie punte saamgevat:

Sonde

Eerstens: Ons en ons kinders is in sonde ontvang en gebore en is daarom onder die toorn van God, sodat ons nie in die koninkryk van God kan inkom nie,⁴⁷ tensy ons opnuut gebore word.⁴⁸ Dit word aan ons geleer deur die indompeling in en besprinkeling met die water, waardeur die onreinheid van ons siele vir ons aangetoon word, sodat ons vermaan word om 'n afkeer van onself te hê, ons voor God te verootmoedig en ons reiniging en saligheid buite onself te soek.

Verlossing

Tweedens: Die heilige doop betuig en verseël aan ons die afwassing van die sondes deur Jesus Christus.⁴⁹ Daarom word ons gedoop in die Naam van God: die Vader en die Seun en die Heilige Gees.⁵⁰

Want As ons in die Naam van die Vader gedoop word, betuig en verseël God die Vader aan ons dat Hy 'n ewige genadeverbond met ons sluit,⁵¹ dat Hy ons tot sy kinders en erfgename aanneem en ons daarom met alle goeie dinge wil versorg en alle kwaad van ons wil afweer of tot ons beswil wil beskik.

En As ons in die Naam van die Seun gedoop word, verseël die Seun aan ons dat Hy ons in sy bloed van al ons sondes skoon was. Daarmee lyf Hy ons in die gemeenskap van sy dood en opstanding in. Hy doen dit só dat ons van ons sondes bevry en voor God regverdig gereken word.⁵²

Net so ook, wanneer ons in die Naam van die Heilige Gees gedoop word, verseker die Heilige Gees ons deur hierdie heilige sakrament dat Hy in ons wil woon en ons tot lidmate van Christus wil heilig.⁵³ Dit doen Hy deur tot ons eiendom te maak wat ons in Christus het, naamlik die afwassing van ons sondes en die daaglikse vernuwing van ons lewe, totdat ons uiteindelik onder die gemeente van die wat uitverkies is in die ewige lewe vlekkeloos gestel sal word.⁵⁴

Dankbaarheid

Derdens: Omdat alle verbonde uit twee dele bestaan, word ons daarom ook weer deur God met die doop vermaan en verplig tot 'n nuwe gehoorsaamheid.⁵⁵ Ons moet naamlik hierdie enige God, Vader, Seun en Heilige Gees, aanhang, vertrou en liefhê met ons hele hart, met ons hele siel, met ons hele verstand en met al ons kragte;⁵⁶ ons moet van die wêreld afsien, ons ou natuur doodmaak en 'n lewe in volkome toewyding aan God lei. **En** As ons soms uit swakheid in sondes val, moet ons nie aan die genade van God twyfel of in die sondes bly lê nie. Die doop is immers 'n seël en ontwyfelbare getuienis dat ons 'n ewige verbond met God het.

Doop van volwassenes

Kinders van Christene moet, nieteenstaande daarvan dat hulle hierdie dinge nie verstaan nie, [nogtans] kragtens die verbond gedoop word. Tog is dit nie geoorloof om volwassenes te doop nie, tensy hulle tevore hulle sondes besef, belydenis doen van hulle berou en van hulle geloof in Christus. Om hierdie rede het immers nie alleen Johannes die Doper, terwyl hy volgens die gebod van God die bekering tot vergifnis van sondes gepreek het, diegene wat hulle sondes bely gedoop nie (Markus 1:4; Luk 3:3), maar ook ons Here Jesus Christus het sy apostels beveel om alle volke te onderrig en hulle te doop in die Naam van die Vader

⁴⁷ Romeine 3:9, 19; Romeine 5:12-21.

⁴⁸ Johannes 3:3.

⁴⁹ 1 Korintiërs 6:11.

⁵⁰ Matteus 28:19.

⁵¹ Genesis 17:7, Galasiërs 4:6-7.

⁵² 1 Korintiërs 1:30.

⁵³ 1 Korintiërs 12:13.

⁵⁴ Romeine 8:9, 15, 16.

⁵⁵ Romeine 12:1-2.

⁵⁶ Matteus 22:37-40.

en van die Seun en van die Heilige Gees (Mat 28:19). Hy het dit gedoen terwyl Hy die belofte daarby gevoeg het dat dié wat glo en gedoop sal wees, salig sal word (Markus 16:16). So het ook die apostels (soos blyk uit die Handeling van die Apostels, Hd 2:38; 8:36,37; 10:47,48 en 16:14,15,31-33) volgens hierdie reël geen ander volwassene gedoop het as hulle wat belydenis van hulle berou en geloof afgelê het nie. Daarom is dit ook tot vandag toe nie geoorloof om enige ander volwassene te doop nie as net vir hulle wat die verborgenhede van die heilige doop uit die prediking van die heilige Evangelie geleer het en verstaan. Dit is vir hulle wat weet om daarvan – soos ook van hulle geloof – deur die belydenis met hulle mond rekenskap te gee.

Om nou hierdie heilige instelling van God tot sy eer, tot ons troos en tot opbou van die gemeente uit te voer, laat ons daarom sy heilige Naam aanroep:

Gebed

O, almagtige, ewige God,

U het volgens u streng oordeel die ongelowige wêreld wat geen berou gehad het oor hulle sondes nie met die sondvloed gestraf en die gelowige Noag met sy gesin – slegs agt mense – deur u groot barmhartigheid gered en bewaar; U het die verharde Farao met sy hele volk in die Rooisee verdrink en u volk Israel op droë grond daardeur gelei – daardeur is die doop afgebeeld.⁵⁷

Ons bid U, op grond van u oneindige barmhartigheid, dat U hierdie persoon/persone in u genade wil aansien en deur u Heilige Gees in u Seun Jesus Christus wil inlyf, sodat hy/sy/hulle met Hom in sy dood begrawe mag word en met Hom in 'n nuwe lewe mag opstaan.⁵⁸ Ons bid U, laat hy sy / sy haar / hulle hulle kruis blymoedig dra,⁵⁹ terwyl hulle Christus daagliks navolg en Hom aanhang met opregte geloof, vaste hoop en vurige liefde⁶⁰ sodat hy/sy/hulle hierdie lewe, wat tog niks anders as 'n voortdurende sterwe is nie, om u ontwil getroos mag verlaat en op die laaste dag sonder verskrikking voor die regterstoel van Christus, u Seun, mag verskyn.

Dit bid ons deur Hom, ons Here Jesus Christus, u Seun, wat, saam met U en die Heilige Gees, één enige God, leef en regeer in ewigheid. Amen.

Die volwassene wat gedoop gaan word, word soos volg aangespreek

U, N, begeer ook om met die heilige doop gedoop te word, sodat dit vir u 'n seël sal wees van u inlywing in die kerk van God. Met die doel dat dit kan blyk dat u nie alleen die Christelike geloof aanvaar waarin u in die besonder deur ons onderrig is en waarvan u voor ons belydenis gedoen het nie, maar dat u ook, deur die genade van God, u lewe daarvolgens wil rig, moet u voor God en sy gemeente opreg hierop antwoord:

Vrae

Eerstens: Glo u in die enige ware God, onderskei in drie Persone: Vader, Seun en Heilige Gees, wat hemel en aarde en alles wat daarin is, uit niks geskep het en nog so onderhou en regeer dat niks in die hemel of op die aarde sonder sy Goddelike wil gebeur nie?

Antwoord: Ja.

Tweedens: Glo u dat u in sonde ontvang en gebore is en daarom onder die toorn van God is; dat u van nature heeltemal onbekwaam tot enige goed is en tot alle kwaad geneig is; en dat u met gedagtes, woorde en daede die geboorte van die Here baie keer oortree het; en het u oor hierdie sondes van u van harte berou?

Antwoord: Ja.

Derdens: Glo u dat Jesus Christus, wat tegelykertyd ware en ewige God is en ware mens, wat sy menslike natuur uit die vlees en bloed van die maagd Maria aangeneem het, vir u deur God tot 'n Saligmaker geskenk is; dat u deur hierdie geloof vergewing van die sondes in sy bloed ontvang en dat u deur die krag van die Heilige Gees 'n lidmaat van Christus en van sy kerk geword het?

⁵⁷ 1 Petrus 3:20-21.

⁵⁸ Romeine 6:4 ev.

⁵⁹ Matteus 16:24.

⁶⁰ 1 Johannes 4:18.

Antwoord: Ja.

Vierdens: Stem u in met al die Artikels van die Christelike geloof soos dit hier in die Christelike kerk uit die Woord van God geleer word, en is u van voorneme om tot die einde van u lewe in hierdie selfde leer standvastig te volhard? Sien u daarby ook af van alle ketterye en dwalinge wat met hierdie leer in stryd is, en belowe u dat u in die gemeenskap van hierdie Christelike kerk sal volhard, nie alleen in die aanhoor van die Goddelike Woord nie maar ook in die gebruik van die heilige nagmaal?

Antwoord: Ja.

Vyfdens: Het u u van harte voorgeneem om altyd Christelik te lewe en van die wêreld en sy sondige begeerlikhede af te sien soos dit lidmate van Christus en sy gemeente betaam, en wil u u graag aan alle Christelike vermanings onderwerp?

Antwoord: Ja.

Mag die goeie en grote God uit sy goedertierenheid deur ons Here Jesus Christus aan u in hierdie heilige voorneme sy Goddelike genade en seën verleen. Amen.

Doop

Daarna sê die bedienaar by die doop:

N, ek doop u in die Naam van die Vader en die Seun en die Heilige Gees.

Dankgebed

Almagtige, barmhartige God en Vader,

Ons dank en loof U dat U ons en ons kinders deur die bloed van u geliefde Seun, Jesus Christus, al ons sondes vergewe en ons deur u Heilige Gees tot lidmate van u eniggebore Seun en daardeur tot u kinders aangeneem het. Ons dank en loof U dat U dit aan ons met die heilige doop beseël en bekragtig. Ons bid U ook deur Hom, u geliefde Seun, dat U hierdie broer(-s) [en/of] suster(-s) altyd met u Heilige Gees wil regeer, sodat hy/sy/hulle Christelik en godvrugtig lewe en in die Here Jesus Christus groei en toeneem.⁶¹ Ons bid dit sodat hy/sy/hulle u vaderlike goedheid en barmhartigheid, wat U aan hom/haar/hulle en ons almal bewys het, kan bely en in alle geregtigheid onder ons enigste Leraar, Koning en Hoëpriester, Jesus Christus, kan lewe en moedig teen die sonde, die duiwel en sy hele ryk kan stry⁶² en oorwin, om U en u Seun Jesus Christus en ook die Heilige Gees, die enigste ware God, ewig te loof en te prys. Amen.

FORMULIER VIR DIE AFLEGGING VAN BELYDENIS VAN GELOOF

Aan die gemeente

Geliefdes in die Here,

God het in Jesus Christus, ons Here, die verbond van genade met ons en ons kinders gesluit⁶³.

As kinders en erfgename⁶⁴ het ons deel aan die volle rykdom van die weldade van hierdie verbond.⁶⁵ Ons word egter ook tot gehoorsaamheid aan en aanvaarding van die verbond geroep⁶⁶. Daarom moet verbondskinders wanneer hulle tot die nodige insig gekom het⁶⁷, hulle geloof openlik in die midde van die gemeente bely.⁶⁸ Hulle moet ook hulle voorneme bekend maak om deur die krag van die Heilige Gees die verbondsgemeenskap⁶⁹ met God te onderhou.

Gelei deur die Gees van God⁷⁰ en sy woord het hierdie broers en susters die kerkraad gevra om hulle geloof hier openlik te bely. Nadat hulle behoorlik onderrig en ondervra is, is die

⁶¹ Efesiërs 4:16-17.

⁶² Efesiërs 6:10-13.

⁶³ Hand 2:39.

⁶⁴ Rom 8:17.

⁶⁵ Gen 17:9.

⁶⁶ 1 Tim 1:15.

⁶⁷ Kol 2:2.

⁶⁸ 1 Tim 6:12.

⁶⁹ 1 Joh 1:3.

⁷⁰ Gal 4:6.

kerkraad daarvan oortuig dat elkeen van hulle toegerus⁷¹ is om tot so 'n persoonlike belydenis te kom.

Daarom word aan elkeen van hulle nou afsonderlik die geleentheid daarvoor gegee.

U kom nou hier voor die aangesig van God en in die midde van sy gemeente om u geloof te bely. Daarom versoek ek u om in alle opregtheid op die volgende vrae te antwoord:

- 1 Glo u in die enige ware God⁷²: Vader, Seun en Heilige Gees, in wie se Naam u gedoop is?⁷³
- 2 Glo en bely u dat al is u in sonde ontvang en gebore⁷⁴ en al is u nog steeds tot alle boosheid geneig⁷⁵, u tog in Christus geheilig⁷⁶, deur die Vader tot sy kind aangeneem⁷⁷ en deur die Heilige Gees tot 'n nuwe gehoorsaamheid opgewek is?⁷⁸
- 3 Glo en bely u dat die Ou en Nuwe Testament die Woord van God en die volkome leer van die Saligheid is, soos dit ook in die Belydenisskrifte van die Gereformeerde Kerke uitgedruk word en in die kerk hier geleer word?
- 4 Neem u u voor om deur die genade van God in hierdie leer tot die einde van u lewe standvastig te volhard⁷⁹, om die verbondsgemeenskap met God te onderhou⁸⁰, om Hom van harte lief te hê⁸¹ en in gehoorsaamheid aan sy Woord te dien⁸²? Neem u u ook voor om van die wêreld en sy begeerlikheid af te sien⁸³, om u lewe en u saligheid buite uself in Christus te soek en om so hierdie belydenis van u met 'n godvresende lewe te bevestig⁸⁴?
- 5 Beloof u, terwyl die volle gemeenskap met die kerk van Christus nou vir u ontsluit word, om as 'n lewende lid van die kerk⁸⁵ die bediening van die Woord en van die sakramente ywerig op te soek⁸⁶, om u gawes gewillig en met vreugde tot nut en saligheid van die ander lidmate⁸⁷ en tot die uitbou van die koninkryk van God te gebruik⁸⁸? ~~Een~~ Beloof u verder om u aan die Christelike vermaning en tug⁸⁹ te onderwerp⁹⁰ as u in leer of lewe sou oortree?

NN, wat is hierop u antwoord

Antwoord: Ja

Opwekking en verwelkoming

Waar u hier openlik u geloof bely en God se verbondsbeloftes wat in u doop verseël is, aanvaar het, moedig ons u aan om hierin te volhard⁹¹.

In die Naam van ons Here Jesus Christus heet ons u hartlik welkom in die volle gemeenskap met die volk van God. God van alle genade het ons tot sy ewige heerlikheid in Christus Jesus geroep. Mag Hy self, nadat ons 'n kort tyd gely het, u tot volmaaktheid bring, bevestig, versterk en grondves. Aan Hom die heerlikheid en die krag tot in alle ewigheid. Amen.

⁷¹ Ef 4:12.
⁷² Deut 6:4.
⁷³ Matt 28:19.
⁷⁴ Ps 51:7.
⁷⁵ Rom 7:21.
⁷⁶ Heb 10:10.
⁷⁷ Ef 1:5.
⁷⁸ 1 Pet 1:21.
⁷⁹ 1 Tim 4:16.
⁸⁰ Joh 15:4.
⁸¹ Deut 6:5.
⁸² 1 Sam 15:22.
⁸³ 1 Pet 1:14.
⁸⁴ 1 Kor 1:30.
⁸⁵ 1 Pet 2:5.
⁸⁶ 1 Pet 2:2.
⁸⁷ Filip 2:4.
⁸⁸ Hand 1:8.
⁸⁹ Spr 8:33.
⁹⁰ Matt 18:15.
⁹¹ Matt 24:13.

FORMULIER VIR DIE HUWELIKSBEVESTIGING

Geliefdes in ons Here Jesus Christus, God het die huwelik met hierdie woorde ingestel: Dit is nie goed dat die mens alleen is nie. Ek sal vir hom 'n hulp maak wat by hom pas⁹².

Toe het die HERE God 'n diep slaap op die mens laat val; en terwyl hy slaap, het Hy een van sy ribbebene geneem en die plek daarvan met vleis toegemaak. En die HERE God bou die rib wat Hy van die mens geneem het, tot 'n vrou en bring haar na die mens toe. Toe sê die mens: Dit is nou eindelijk been van my gebeente en vleis van my vleis. Sy sal mannin genoem word, want sy is uit die man geneem. Daarom sal die man sy vader en moeder verlaat en saam met sy vrou leef en hulle sal een word⁹³.

Net so lei God vandag nog elke man en vrou na mekaar toe. Van hierdie instelling van die huwelik getuig ons Here Jesus Christus ook toe Hy gesê het: “Het julle nie gelees dat Hy wat hulle gemaak het, hulle van die begin af man en vrou gemaak het nie”, en gesê het: “Om hierdie rede sal die man sy vader en sy moeder verlaat en saam met sy vrou leef, en hulle twee sal een word; sodat hulle nie meer twee is nie, maar een? Wat God dan saamgevoeg het, mag geen mens skei nie⁹⁴. Daarom het Hy die huwelik ook so hoog geëer deur sy teenwoordigheid en sy wondertekens op die bruilof in Kana⁹⁵. En Paulus sê, met Christus en sy kerk in die oog, dat die huwelik 'n groot geheimenis is. Hieruit leer ons dat die huwelik, wat in die welbehae van God gegrond is, baie eerbaar is, want dit is 'n afbeelding van die verhouding tussen Christus en die kerk⁹⁶.

Die getroudes kan daarom ook in hulle hart verseker wees van die hulp en bystand van God, selfs wanneer hulle dit glad nie verwag nie. Hoewel getroudes as gevolg van die sonde gewoonlik deur allerhande teëspoed getref word en hoewel daar swaarkry oor hulle kom, kan u dit nogtans geduldig en dankbaar aanvaar, aangesien dit alles uit die hand van die Here kom.

~~Maar~~ U moet ook weet wat die doel van die huwelik is.

Die een moet die ander een getrou help en bystaan in alles wat betrekking het op die tydelike en ewige lewe. Die menslike geslag moet ook deur die huwelik opgebou word⁹⁷, en ouers moet hulle kinders opvoed in die ware kennis en eerbiedige liefde tot God tot sy eer en tot hulle saligheid.

Verder dien die huwelik om die mens alle onkuisheid te laat vermy. Daarom moet elke man sy eie vrou hê en elke vrou haar eie man⁹⁸, met medewete en toestemming van hulle ouers of voogde. Hulle huwelikslewe moet heilig wees, sodat die tempel van God, naamlik die liggaam, nie besoedel word nie.

U moet ook weet hoe die optrede van die een teenoor die ander volgens die Woord van God moet wees: ~~En~~ Dan moet u, man, weet dat God u as hoof van die vrou gestel het, soos Christus die Hoof van sy kerk is⁹⁹. U moet haar liefhê en verstandig lei, leer, vertrous en beskerm en haar as vrou eer. U moet nie teen haar verbitterd word nie maar verstandig met haar saambly. U moet ook ywerig en getrou u beroep beoefen, sodat u u gesin eerbaar kan versorg en ook aan die wat gebrek ly, iets kan gee.

~~En~~ U, vrou, moet u man liefhê, hom eer en gehoorsaam wees¹⁰⁰ in alles wat reg en billik is, net soos die kerk aan Christus onderdanig is. U moet u man ook behulpsaam wees in alles wat goed en reg is¹⁰¹, en aan u gesin en huishouding die regte aandag gee. Verder moet u ingetoë en eerbaar lewe, vir ander tot voorbeeld in deugsamheid¹⁰².

Die bedienaar vra nou aan die bruidspaar:

⁹² Genesis 2:8.

⁹³ Genesis 2:21-24, Matteus 19:4-6.

⁹⁴ Matteus 19:4-6.

⁹⁵ Johannes 2:1-11.

⁹⁶ Efesiërs 5:3.2

⁹⁷ Genesis 1:28

⁹⁸ 1 Tessalonisense 4:3-5

⁹⁹ Efesiërs 5:23, 25

¹⁰⁰ Efesiërs 5:24

¹⁰¹ Genesis 3:16

¹⁰² 1 Petrus 3:1-6

AB en CD, nou dat u weet dat God die huwelik ingestel het en wat Hy u daarin beveel, getuig u hier voor God en almal wat teenwoordig is, dat dit u opregte voorneme is om so in hierdie heilige staat te lewe, en begeer u dat u huwelik nou gesluit en bevestig sal word?

Antwoord: Ja.

Verklaar u, AB, dat, sover u weet, daar geen wettige verandering is teen u voorgenome huwelik met CD hier teenwoordig nie en dat u almal hier teenwoordig roep om getuie te wees dat u CD tot u wettige vrou neem?

Antwoord: Ja.

Verklaar u, CD, dat sover u weet, daar geen wettige verandering is teen u voorgenome huwelik met AB hier teenwoordig nie en dat u almal hier teenwoordig roep om getuie te wees dat u AB tot u wettige man neem?

Antwoord: Ja.

Daarna spreek die bedienaar die bruidspaar soos volg toe:

Mag ons Here God die voorneme wat Hy u gegee het, bekragtig, en mag die begin van u huwelik wees in die Naam van die Here wat hemel en aarde gemaak het!

Nou gee hulle mekaar die regterhand, en die bedienaar rig hom tot die bruidegom:

AB, u het hier voor God en almal teenwoordig verklaar dat u CD as u wettige vrou neem. Beloof u dat u haar nooit sal verlaat nie, dat u haar sal liefhê en getrou sal onderhou soos 'n getroue en Godvresende man aan sy vrou verskuldig is? Beloof u verder dat u heilig met haar sal lewe en in alles aan haar getrou sal bly in ooreenstemming met dit wat die heilige evangelie hieroor sê?

Wat is u antwoord?

Antwoord: Ja.

Daarna rig die dienaar hom tot die bruid:

CD, u het hier voor God en almal teenwoordig verklaar dat u AB as u wettige man neem. Beloof u dat u hom sal liefhê, hom gehoorsaam sal wees, hom sal dien en help en hom nooit sal verlaat nie? Beloof u verder dat u heilig met hom sal lewe en in alles aan hom getrou sal bly, soos 'n vrome en getroue vrou aan haar man verskuldig is in ooreenstemming met dit wat die heilige evangelie hieroor sê?

Wat is u antwoord?

Antwoord: Ja.

Hierna sê die bedienaar:

Ek verklaar nou dat AB en CD hier teenwoordig regtens getroud is. Mag die Vader van alle barmhartigheid, wat u deur sy genade tot hierdie huwelik geroep het, u met opregte liefde en trou verbind en u sy seën gee! Amen.

Maar omdat daar in onself niks goeds is nie en omdat alle goeie gawes van bo kom, van die Vader van die ligte, versoek ek u om neer te kniel voor die Here, sodat ons almal saam met u en vir u kan bid.

Laat ons bid.

Gebed

Almagtige God, U maak u goedheid en wysheid bekend in alles wat U doen. U het ook van die begin af gesê dat dit nie goed is dat die mens alleen is nie. U het vir hom 'n hulp geskep wat by hom pas, en bepaal dat dié wat twee was, een moet wees. U het hierdie egpaar tot die heilige huwelik geroep en saam verbind. Ons bid dat U hulle deur u Heilige Gees wil lei, sodat hulle in 'n ware en vaste geloof heilig volgens u Goddelike wil sal lewe en dat hulle alle boosheid sal teenstaan. Seën hulle ook, soos U die gelowige vaders, u getroue vriende en dienaars, Abraham, Isak en Jakob, geseën het. *Hulle is mede-erfgename van die verbond wat U met hierdie vaders gesluit het. Daarom bid ons dat, as U dit goeddink om vir hulle

* Laat weg waar nie toepaslik nie.

kinders te gee, U aan hulle die genade sal verleen om dié kinders Christelik op te voed tot eer van u heilige Naam, tot opbou van u kerk en tot verspreiding van u heilige evangelie. Verhoor ons, Vader van alle barmhartigheid, deur Jesus Christus, u geliefde Seun, ons Here, wat saam met U en die Heilige Gees leef en regeer - die enige, ware, ewige God, wat altyd geprys moet word.
Amen.

Ten slotte versoek die bedienaar om 'n gepaste seënbede te sing, en sê daarna:
Mag ons HERE God u met sy genade vervul en gee dat u in alle godsaligheid en liefde saamverbind lank en heilig mag lewe! Amen.

FORMULIER VIR DIE BAN OF AFSNYDING VAN 'N LIDMAAT VAN DIE GEMEENTE

Geliefdes in die Here Jesus Christus,
Daar is reeds verskeie kere bekend gemaak dat N ernstig gesondig het en daardeur ernstig aanstoot gegee het. Dit het ons gedoen sodat hy/sy deur u Christelike vermanings en gebede hom/haar tot God kan bekeer.

Hy/sy het in die strik van die duiwel geval¹⁰³, en dié hou hom/haar in sy mag om sy wil te doen. Hy/sy verset hom/haar hardnekkig teen die wil van die Vader¹⁰⁴. Met hartseer moet ons sê dat niemand tot nou toe kon getuig dat hy/sy sy/haar sonde opreg bely en ware berou betoon het en hom/haar van sy/haar verkeerde pad bekeer het nie. Inteendeel, hy/sy maak sy/haar skuld deur verharding en 'n onbekeerlike hart nog elke dag meer.

Ons het u reeds meegedeel dat ons die laaste geneesmiddel sal moet toepas as hy/sy hom/haar na al die geduld wat die kerk gehad het, nie bekeer nie. Hy/sy moet volgens opdrag van God van die gemeente afgesny word, sodat die hele liggaam nie deur die verrottende en tot nog toe ongeneeslike lid besmet en die Naam van God gelaster word nie¹⁰⁵.

Daarom verklaar ons, die kerkraad van hierdie gemeente, in die Naam en krag van ons Here Jesus Christus dat N nou uit die gemeente van God uitgesluit is. Met opregte droefheid sny ons hom/haar af van die gemeenskap met Christus, van die heilige sakramente, van alle geestelike seëninge van God wat die gemeente kragtens die belofte van die Koning van die kerk toekom. Jesus Christus sê immers: Alles wat julle op die aarde toesluit, sal in die hemel toegesluit bly¹⁰⁶.

Geliefde Christene, ons vermaan u: moet nie met hom/haar omgaan nie, sodat hy/sy beskaam mag word. U moet hom/haar egter nie as vyand beskou nie maar wys hom/haar juis van tyd tot tyd in liefde tereg¹⁰⁷.

Geliefde broeder en suster, u het gesien hoe hierdie man/vrou deur verharding tot 'n val gekom het. Leer uit hierdie hartseer saak opnuut om die Here met ontsag lief te hê en luister na die woorde van die apostel: Wie meen dat hy staan, moet oppas dat hy nie val nie¹⁰⁸. Volhard daarom getrou in die gemeenskap met die Vader en die Seun en die Heilige Gees en ook met alle gelowiges. Doen dit tot die einde toe in die hoop op die heerlijkheid van God. Waak en stry dan teen die sonde, die duiwel en sy listigheid; moet nie u hart verhard nie; bely u sondes, betoon berou en sorg deur bekering dat u lewenswyse in ooreenstemming met die evangelie van Christus is.

Laat ons elke las afgooi, ook die sonde, wat ons so maklik verstrik, en laat ons die wedloop wat voor ons lê, met volharding loop, die oog gevestig op Jesus, die Begin en Voleinder van ons geloof¹⁰⁹ - alles tot eer van God die Here¹¹⁰.

¹⁰³ 1 Timoteus 3:7.

¹⁰⁴ 1 Johannes 3:8ev., Johannes 8:44.

¹⁰⁵ 1 Korintiërs 5:5, 7, 13.

¹⁰⁶ Matteus 16:19.

¹⁰⁷ 1 Korintiërs 5:11, 1 Timoteus 5:22, 1 Tessalonisense 3:14-15.

¹⁰⁸ 1 Korintiërs 10:1.2

¹⁰⁹ Hebreërs 12:1-2.

¹¹⁰ Filippense 2:13.

~~Maar~~ Aangesien dit egter God is wat in ons werk en ons gewillig en bekwaam maak om sy heilige plan uit te voer, laat ons sy Naam aanroep.

Almagtige, regverdigte God en barmhartige Vader,
Ons bely dat ons swaar teen u gesondig het. Ons verdien die hartseer en smart wat die afsnyding van ons gewese lidmaat by ons veroorsaak het. Ons bid U, wees ons om Christus ontwil genadig en barmhartig; vergewe ons, Here, en handel met ons nie volgens ons sondes en vergeld ons nie vir ons ongeregthede nie. Ons bid U, wek deur u Gees in ons hart steeds meer 'n gevoel van hartseer oor die sonde. Laat ons U, die Here, met ontsag liefhê vanweë u oordele oor hulle wat sonder berou of bekering hardnekkig in die sonde bly voortlewe. Bewaar ons van besmetting deur die wêreld. Gee ons ~~in Jesus Christus~~ die krag tot bekering in die lewe in Jesus Christus.~~[[Kontroleer]]~~. Ons smee U, seën ons vermanings. Bring uit genade en deur ons vermaning en voorbeeld die afgesnyde sondaar/sondares en almal wat hulle verhard en in ongeloof lewe, weer op die regte pad terug. ~~En~~ Bring ook oor ons vreugde in plaas van hartseer, blydschap in plaas van droefheid. Laat so u Naam geheilig word in Jesus Christus, ons Here, deur die gemeenskap van die Heilige Gees, tot in ewigheid. Amen.

FORMULIER OM 'N AFGESNYDE LIDMAAT WEER IN DIE GEMEENTE VAN CHRISTUS OP TE NEEM

Afkondiging

Geliefdes in die Here Jesus Christus,

Die kerkraad maak met vreugde aan u bekend dat N, wat 'n tyd gelede van die gemeente van Christus afgesny is, die opregte begeerte het om weer in die gemeente opgeneem te word.

Deur die geneesmiddel van die afsnyding sowel as deur ernstige vermanings en u gebede vir hom/haar het hy/sy so ver gekom om sy/haar sondes te bely, berou te betoon en hom/haar van sy/haar sondige pad te bekeer. Ons moet volgens die bevel van God die wat hulle bekeer, weer met blydschap in die gemeenskap ontvang. Daarom sal die kerkraad N, na instemming deur die gemeente, van die ban of afsnyding onthef, sodat hy/sy aan die viering van die heilige nagmaal deel kan hê. As iemand hierteen wettige beswaar het, moet hy/sy die kerkraad betyds van die beswaar verwittig. Intussen moet elkeen die Here dank vir die genade wat Hy aan hierdie sondaar/sondares bewys het, en tot die Here bid dat Hy die broeder/suster tot sy/haar ewige saligheid in sy troue Vadersorg sal behou.

Die formulier vir opneming

Geliefdes in die Here Jesus Christus,

Die kerkraad het met vreugde aan u bekend gemaak dat broeder/suster N hom/haar opreg bekeer het sodat hy/sy met u medewete weer in die gemeente van Christus opgeneem kan word¹¹¹.

Nadat die Here Jesus in Matteus 18 die vonnis van sy kerk in die afsnyding van die sondaars wat nie berou betoon nie bevestig het, verklaar Hy onmiddellik daarby dat alles wat sy dienaars op die aarde oopsluit, in die hemel oopgesluit bly. Daarmee gee Hy te kenne dat wanneer iemand deur sy kerk afgesny is, alle hoop op die saligheid hom nie ontnem is nie maar dat hy weer van die bande van die verdoemenis vry kan word¹¹². Omdat God dus in sy Woord verklaar dat Hy nie vreugde vind in die dood van die sondaar nie maar daarin dat hy hom bekeer en lewe¹¹³, daarom het die kerk ook nog altyd hoop op die bekering van die afgedwaalde sondaar en hou sy arms oop om die bekeerde weer te ontvang.

Daarom hoef niemand wat hom/haar opreg bekeer, enigsins daaraan te twyfel dat hy/sy beslis deur God in genade aangeneem is nie.

¹¹¹ 2 Korintiërs 2.

¹¹² Matteus 18:18.

¹¹³ Esegjël 18:23.

Christus self bevestig dit immers wanneer Hy sê: “As julle vir mense hulle sondes vergewe, word dit hulle deur God vergewe; as julle dit nie vergewe nie, word dit nie deur God vergewe nie¹¹⁴”.

Verder beveel Paulus nie net dat 'n sondaar uit die gemeente verwyder moet word nie maar ook dat hy/sy vergewe en bemoedig moet word nadat hy/sy na bestrawwing tot insig gekom het¹¹⁵.

Verwelkom hom/haar daarom in liefde en loof die Here.

Aanspraak

Geliefde broeder/suster in die Here Christus,

U staan hier voor God en sy heilige gemeente om openlik te verklaar dat die afsnyding regverdig was, dat u u sondes bely het, berou betoon het en u van u verkeerde pad bekeer het. Ons versoek u daarom om opreg op elkeen van die volgende vrae te antwoord:

Vrae

Glo u dat die Here u sondes ter wille van Jesus Christus vergewe het?

Antwoord: Ja.

Begeer u om weer in die gemeente van Christus opgeneem te word?

Antwoord: Ja.

Beloof u om u voortdurend te bekeer en getrou volgens die Woord van God te lewe?

Antwoord: Ja.

N, in die Naam van ons Here Jesus Christus verklaar ons dat die afsnyding nou opgehef is¹¹⁶.

U is weer in die gemeente van Christus opgeneem en het daarom weer deel aan die gemeenskap van Christus, aan die heilige sakramente en aan alle geestelike seëninge van God wat die gemeente kragtens die beloftes van God toekom¹¹⁷. Wees verseker van die genade van God, waak en stry teen die sonde, die duiwel en sy listigheid.

~~En~~ Mag God u om Jesus Christus ontwil tot die einde toe bewaar. Amen.

~~En~~ U, geliefde gemeente, ontvang u broer/suster in hartlikheid en liefde weer terug in die koninkryk van God en as 'n broeder/suster in die gemeente. Wees bly want hy/sy was dood en het weer lewend geword, verlore en is gevind¹¹⁸.

Verheug u saam met die engele in die hemel oor hierdie sondaar/sondares wat hom/haar bekeer het¹¹⁹.

Laat ons nou die Here loof en dank!

Dankgebed:

Ons Vader wat in die hemel is,

Ons dank U vir die bekering en die nuwe lewe wat u ons broeder/suster geskenk het¹²⁰. Ons verheug ons oor u genade en lankmoedigheid.

Ons bid U wees hom/haar steeds genadig; vernuwe hom/haar na u ewebeeld, sodat hy/sy U in blydschap kan dien¹²¹.

Skenk hom/haar krag om tot die einde toe in die geloof te volhard¹²² en laat ons uit hierdie voorbeeld leer dat daar by U genade is. Ons bid U, verseker hom/haar en ons dat ons almal ter wille van die Here Jesus Christus mede-erfgename van die ewige lewe is. Amen

¹¹⁴ Johannes 20:23.

¹¹⁵ 2 Korintiërs 2:6-8.

¹¹⁶ Matteus 18:18.

¹¹⁷ Efesiërs 4:12-16, Romeine 8:30.

¹¹⁸ Lukas 15:24.

¹¹⁹ Lukas 15:1-10.

¹²⁰ Esegjël 18:23.

¹²¹ Efesiërs 4:23-24.

¹²² Matteus 24:13.

FORMULIER VIR DIE BEVESTIGING VAN BEDIENAARS VAN DIE WOORD

Geliefdes in ons Here Jesus Christus

Die naam van ons broer, N, wat hier teenwoordig is, is herhaaldelik in die gemeente afgekondig nadat hy as herder en leraar van hierdie gemeente beroep is. Niemand het 'n wettige beswaar teen sy leer en lewe ingebring nie, en daarom gaan ons nou in die Naam van die Here tot sy bevestiging oor. Dit is egter nodig dat u, broer N, en ons almal wat hier teenwoordig is, eers moet luister wat die Woord van God ons oor die instelling en ampswerk van die herders of bedienaars van die Woord leer.

Ons glo dat Christus mense tot besondere dienste in sy kerk roep. Daarom gee hy aan sy kerk apostels en profete; ander gee Hy as evangeliste, ander as herders en leraars om die gelowiges vir hulle dienswerk toe te rus tot opbou van die liggaam van Christus¹²³.

As herder en leraar is u, geliefde broer, geroep om die kudde van God wat aan u sorg toevertrou word, te versorg, te lei en te beskerm. U moet dit doen deur die verkondiging van die Woord, die bediening van die sakramente, die diens van gebede en deur te help met die regering van die kerk¹²⁴.

U ampswerk is dus die volgende:

1. U moet die Woord van God deeglik ondersoek en suiwer en eenvoudig aan die gemeente verkondig. As herder moet u vashou aan die betroubare Woord wat volgens die leer is, en dit betroubaar verkondig¹²⁵. In die eredienste en by huisbesoek moet u die lidmate onderrig en vertroos, vermaan en tereg wys volgens die eis van elkeen se omstandighede. Paulus sê immers: Ek besweer jou voor God en die Here Jesus Christus, wat die lewende en die dode sal oordeel by sy verskyning en sy koninkryk ~~wat I by sy verskyning en sy koninkryk~~ ~~[[Kontroleer]] die lewendes en die dooies sal oordeel~~: verkondig die woord; hou aan, tydig en ontydig; weerlê, bestraf, vermaan met alle lankmoedigheid en lering¹²⁶.

2. U moet die sakramente bedien wat die Here as tekens en seëls van sy genadeverbond ingestel het. Uit die bevel van Christus aan sy kerk is dit duidelik dat die doop bedien moet word¹²⁷ en dat sy dood by die nagmaal herdenk moet word.

3. U moet die Naam van die Here in die erediens aanroep met belydenis van skuld, met lof- en danksegging, en u moet vir alle mense voorbidding doen¹²⁸.

4. U moet die verbondskinders onderrig in die kennis van die Woord van God, gedagtig aan die woord van Christus aan Petrus: "Laat my lammers wei"¹²⁹.

5. U moet saam met die ouderlinge oor die gemeente toesig hou en sorg dat alles ordelik verloop. Die gemeente moet teen dwaalleer beskerm word, en lidmate moet nie sondig en sleg lewe soos die goddeloses nie. Vir die doel is aan die apostels en in hulle aan die opsieners, van wie u een is, die sleutels van die hemelryk toevertrou¹³⁰.

6. Dit is ook u roeping om aan die wêreld die evangelie te verkondig¹³¹ en om die gelowiges aan te moedig om die Naam van die Here Jesus voor die mense te bely. U moet ook die afgedwaaldes opsoek om hulle in die gemeenskap van die kerk terug te bring¹³².

U besef dus hoe heerlik maar ook hoe verantwoordelik die roeping en diens van die bedienaar van die Woord is, terwyl u die volgende woorde van die apostel in gedagte hou: Dit is alles die werk van God. Hy het ons met Homself versoen deur Jesus Christus en aan ons die bediening van die versoening toevertrou. Die boodskap van die versoening bestaan daarin dat God deur Christus die wêreld met Homself versoen het deur hulle hul oortredings nie toe te reken nie. Die boodskap van versoening het Hy aan ons toevertrou. Ons tree dus

¹²³ Efesiërs 4:11-12.

¹²⁴ Handeling 20:28.

¹²⁵ Titus 1:9, 2 Timoteus 2:15.

¹²⁶ 2 Timoteus 4:1, 2.

¹²⁷ Matteus 28:19.

¹²⁸ 1 Timoteus 2:1.

¹²⁹ Johannes 21:15.

¹³⁰ Matteus 16:19.

¹³¹ Matteus 28:19.

¹³² Lukas 15:1-10.

op as gesante van Christus, asof God deur ons vermaan. Ons smeeek julle namens Christus: Laat julle met God versoen¹³³.

Vrae

N, u het gehoor wat u opdrag is. Ons vra u nou om opreg op die volgende vrae te antwoord:

1. Is u in u hart daarvan oortuig dat u wettig deur die gemeente van God en daarom deur God self tot hierdie heilige diens geroep is?
2. Glo u dat die Heilige Skrif die Woord van God is en die volmaakte leer van die saligheid bevat, en verwerp u alle leringe wat daarmee in stryd is?
3. Beloof u om u Goddelike opdrag getrou en met ywer ooreenkomstig hierdie leer uit te voer?
4. Beloof u om u lewe ooreenkomstig hierdie leer in te rig?
5. Beloof u om u aan die kerklike vermaning en tug te onderwerp as u miskien in leer of lewe afwyk?

Wat is hierop u antwoord?

Hierop moet hy antwoord: Ja

Daarna moet die bevestiger en ander bedienaars van die Woord hom die regterhand oplê en sê:

Mag God, ons hemelse Vader, wat u tot hierdie diens geroep het, u deur sy Heilige Gees verlig, u deur sy hand versterk en u in u bediening so regeer dat u lewe en werk sal dien tot verheerliking van sy Naam en tot uitbreiding van die koninkryk van sy Seun, Jesus Christus! Amen.

Daarna moet die bevestiger van die kansel af die bevestigde bedienaar van die Woord en verder die hele gemeente soos volg vermaan:

Geliefde broer en mededienaar,

U moet Christus liefhê en as herder sy skape laat wei, oor hulle toesig hou, nie uit dwang nie maar gewilliglik, nie om die verkeerde redes nie maar met bereidwilligheid; ook nie uit heerssug oor die wat God aan u sorg toevertrou het nie, maar met die opregte begeerte om 'n voorbeeld vir die kudde te wees¹³⁴.

Wees 'n voorbeeld vir die gelowiges in woord, in lewenswyse, in liefde, in gees, in geloof, in reinheid. U moet aanhou met voorlesing, vermaning en lering.

Leef daarin, sodat u vooruitgang vir almal duidelik kan wees. Moenie die genadegawes wat aan u gegee is, verwaarloos nie¹³⁵.

Let op u lewe en u leer, hou daarmee vol, want deur dit te doen sal u uself red sowel as die wat u hoor¹³⁶. Ly dan verdrukking, soos 'n goeie soldaat van Jesus Christus¹³⁷. ~~En~~ Wanneer die Opperherder verskyn, sal u die heerlikheid as onverganklike kroon ontvang¹³⁸.

~~En~~ U, geliefde gemeente, ontvang u bedienaar van die Woord met blydschap¹³⁹. Betoon hom die nodige agting. Dink daaraan dat God self deur hom met u praat. Laat die koms van hom wat die goeie boodskap bring, vir u lieflik en aangenaam wees. Dink aan hom in u gebede¹⁴⁰.

Wees gehoorsaam aan u voorgangers, want hulle hou wag oor u lewe, en hulle moet aan God rekenskap gee¹⁴¹. As u dit doen, sal die vrede van God in u huise inkom en sal u wat hierdie broer, wat 'n profeet is, ontvang¹⁴², die loon van 'n profeet verwerf; en omdat u deur sy woord in Christus glo, sal u deur Christus die ewige lewe beërf.

¹³³ 2 Korintiërs 5:18-20.

¹³⁴ Slegs wanneer 'n proponent bevestig word.

¹³⁵ 1 Petrus 5:2-3

¹³⁶ 1 Timoteus 4:12-15

¹³⁷ 1 Timoteus 4:16

¹³⁸ 2 Timoteus 2:3

¹³⁹ 1 Petrus 5:4

¹⁴⁰ Jesaja 52:7

¹⁴¹ 1 Tessalonisense 5:25, 2 Tessalonisense 3:1

¹⁴² Hebreërs 13:17

¹⁴³ Matteus 10:41

~~Maar~~ Omdat egter niemand uit homself tot hierdie dinge in staat is nie, laat ons met danksegging tot God bid.

Gebed

Barmhartige Vader, Ons dank U dat U aan hierdie gemeente 'n getroue bedienaar skenk. Ons bid U, maak hom deur u Gees hoe langer hoe meer bekwaam vir die taak waarvoor U hom voorberei en waartoe U hom geroep het. Verlig sy verstand dat hy u Woord kan verstaan en gee aan hom vrymoedigheid om die geheimenis van die evangelie bekend te maak. Verleen hom wysheid en insig om die gemeente saam met die ouderlinge reg te regeer en om die Christelike vrede te bewaar, sodat die gemeente onder sy bediening en deur sy goeie voorbeeld in getal en in deug kan toeneem. Gee dat hy moedig mag wees in alle moeilikhede wat hy in sy diens mag teëkom. Versterk hom deur die troos van u Heilige Gees, sodat hy tot die einde toe standvastig kan bly en eenmaal saam met die getroue dienaars in die vreugde van die Here ontvang mag word.

Gee aan die gemeente ook u genade om hulle teenoor hulle herder te gedra soos dit hoort. Laat hulle hom erken as een wat deur U gestuur is en hulle aan sy lering en vermaning onderwerp, sodat hulle deur sy bediening van die Woord in Christus kan glo en deel kan kry aan die ewige lewe. Verhoor ons, o Vader, deur u geliefde Seun. Amen.

FORMULIER VIR DIE BEVESTIGING VAN OUDERLINGE EN DIAKENS

Geliefdes in ons Here Jesus Christus,

U weet hoe ons nou verskillende male die naam/name afgekondig het van ons broer(s) wat as ouderling(e) en diaken(s) van hierdie gemeente verkies is, ten einde te verneem of iemand iets het waarom hy/hulle nie in sy/hulle diens bevestig mag word nie. Aangesien niemand egter enige wettige beswaar teen sy/hulle bevestiging voorgelê het nie, sal ons hom/hulle nou in sy/hulle diens bevestig. Vir die doel moet u, broer(s) wat bevestig word, en ook alle aanwesiges eers uit die Woord van God 'n kort uiteensetting van die instelling en ampswerk van die ouderlinge en diakens aanhoor.

'n Ouderling is iemand wat die diens van regering in die gemeente van Christus beoefen¹⁴³. Ouderlinge of opsieners¹⁴⁴ het deurgaans in die apostoliese kerk die gemeente met die Woord geregeer en versorg¹⁴⁵ volgens die gawes wat die Heilige Gees gegee het.

Wat die diakens betref: 'n Diens om die gemeente as een gemeenskap in Christus te laat lewe, het spoedig in die apostoliese kerke nodig geword¹⁴⁶. Hierdie diens word duidelik onderskei van die diens van die Woord en gebede asook van die diens van regering¹⁴⁷.

Ons glo dat Christus mense tot besondere dienste in sy kerk roep om die gelowiges vir hulle dienswerk toe te rus tot opbou van die liggaam van Christus. Daarom rus Christus hulle ook toe met die gawes wat hulle nodig het.

As ouderling(e), geliefde broer(s), word u geroep om die gemeente te regeer en te versorg. Hierdie diens word nie net aan een of twee toevertrou nie, maar aan al die ouderlinge saam¹⁴⁸, wat onder leiding van en saam met die bedienaar van die Woord die kerkraad vorm. Om hierdie diens behoorlik te kan uitoefen is dit nodig dat die ouderlinge die Woord van God deeglik ondersoek en hulle oefen in die rykdom van die evangelie.

U opdrag as ouderling(e) is dus die volgende:

1. U moet toesien dat alles in die kerk behoorlik volgens goeie orde plaasvind, dat die Woord en sakramente gereeld en suiwer bedien word en dat die sakramente heilig gehou word. U moet daarop let dat die bedienaar(s) van die Woord, die ouderlinge en diakens getrou en deeglik hulle Goddelike opdragte uitvoer, en u moet die bedienaar(s) van die Woord met goeie raad bystaan.

¹⁴³ Handeling 15:6; Handeling 20:28.

¹⁴⁴ Filippense 1:1.

¹⁴⁵ 1 Timoteus 3:1-2, Titus 1:5-9, 1 Petrus 5:1-3.

¹⁴⁶ Handeling 2:42, 44-46; Handeling 4:32-37; Handeling 6:1-4

¹⁴⁷ 1 Timoteus 3:2, 8; Filippense 1.

¹⁴⁸ Handeling 15:6.

2. U moet sorgvuldig let op die leer en lewe van elke lidmaat en alle Christene met raad en troos ondersteun. Teen die lidmate wat hulle nie bekeer nie en in hulle sondes voortlewe, moet met die kerklike vermaning en tug opgetree word¹⁴⁹, en die wat berou het, moet weer in die gemeenskap van die kerk ontvang word.

3. U moet veral oor die leer en wandel van bedienaars van die Woord toesig hou, sodat alles tot opbou van die kerk mag strek en geen vreemde leer verkondig word nie¹⁵⁰.

4. U moet ook die afvalliges en heidene tot bekering en geloof in Jesus Christus roep, want so vergader Christus sy kerk.

As diaken(s), geliefde broer(s), word u geroep om sorg te dra dat die gemeente hulle eenheid in Christus in daadwerklike onderlinge liefde beoefen. U moet ook toesien dat die gelowiges aan almal goed doen, sodat die liefde van Christus op hierdie wyse openbaar kan word.

Saam met u medediakens moet u

almal besoek en hulle aanspoor om praktiese liefde teenoor die medegelowiges en alle mense te bewys;

deur elkeen te besoek sorg dra dat nie een deur armoede, eensaamheid, ouderdom, siekte of om ander redes van die geloofsgemeenskap vervreem raak nie.

U moet ook die middele wat gegee word tot diens van die wat in nood verkeer, sorgvuldig beheer, met wysheid bestee en met vertroosting uit die Skrif uitdeel.

Sodoende moet u Christus, u medegelowiges en alle mense dien, die gemeente tot diens toerus en die liefde van Christus tot verheerliking van God in die wêreld laat skitter.

U het gehoor wat u opdrag is. Ons vra u nou om opreg op die volgende vrae te antwoord:

Vrae

Is u in u hart daarvan oortuig dat u wettig deur die gemeente van God en daarom deur God self tot hierdie heilige diens geroep is?

Glo u dat die Heilige Skrif die Woord van God is en dat dit die volmaakte leer van die saligheid bevat, en verwerp u alle leringe wat daarmee in stryd is?

Belowe u om u Goddelike opdrag getrou en met ywer in ooreenstemming met hierdie leer uit te voer en volgens hierdie leer te lewe?

Belowe u om u aan die kerklike vermanings en tug te onderwerp as u miskien in leer of lewe afwyk?

Hierop vra die bedienaar:

N, wat is hierop u antwoord?

Hierop moet hy/hulle antwoord:

Ja.

Daarop moet die bedienaar sê:

Mag die alvermoënde God en Vader u sy genade skenk om in hierdie diens getrou en vrugbaar werksaam te wees!

Verder moet hy hom/hulle sowel as die hele gemeente soos volg vermaan:

Wees dan, ouderling(e), ywerig in die regering van die gemeente. Wees soos ('n) wagter(s) oor die huis van God, vermaan en vertroos elkeen na sy behoefte. Wees daarop bedag dat die leer suiwer gehou word en dat die gemeente heilig lewe.

~~En~~ U, diaken(s), wees toegewyd in u diens. Stel vas wat die nood van die gelowiges is, en kom hulle te hulp. Spoor almal tot mededeelsaamheid aan. Wees versigtig in die besteding van die middele wat aan u sorg toevertrou is.

Wees getrou in u diens en wees ('n) goeie voorganger(s) vir die hele gemeente¹⁵¹. So sal u vir uself 'n eervolle plek in die gemeente verwerf en groot vrymoedigheid in u geloof in Christus verkry en na hierdie lewe in die vreugde van die Here ingaan¹⁵².

¹⁴⁹ Efesiërs 4:1, 3, 2 Timoteus 2:25-26.

¹⁵⁰ Handeling 20:29.

¹⁵¹ 1 Timoteus 3:13.

¹⁵² Matteus 25:21, 23.

~~En~~ U, geliefde gemeente, ontvang hierdie man(ne) as dienaar(s) van God. Stel u gewillig onder hulle toesig en regering, want hulle waak oor u lewe en sal eenmaal daarvan rekenskap moet gee¹⁵³.

Laat u, in die beoefening van die gemeenskap van die heiliges, deur die diakens lei¹⁵⁴. Gee sonder bybedoelings en dwang, want God het mense lief wat blymoedig gee¹⁵⁵. Doen u daaglikse werk getrou, sodat u ook hulle kan help wat behoefte het¹⁵⁶.

Dink aan die ouderlinge en diakens in u gebede.

Gebed

~~Maar~~ Omdat ons dit nie uit onself kan doen nie, laat ons die almagtige God aanroep.

Ons Vader,

Ons dank U dat U hierdie man(ne) deur u Gees gelei het om die roeping op te volg. Ons bid U, gee aan hom/hulle steeds meer die gawes wat hy/hulle nodig het om sy/hulle diens te verrig. Skenk aan hom/hulle wysheid, skerpsinnigheid, onderskeidingsvermoë en liefde. Verleen hom/hulle genade om getrou in die diens te volhard en nooit deur teleurstelling, moeite, verdriet of vervolging van die wêreld te verslap nie.

Seën, Here, die gemeente waaroor u hom/hulle gestel het. Maak elkeen gewillig om hom/haar aan die vermaning van die ouderlinge te onderwerp, omdat ons hulle eer ter wille van hulle roeping. Voorsien die gemeente genadig van die nodige middele om ryk te kan wees in vrygewigheid en alle goeie werke. Leer ons, deur die liefde van ons Here Jesus Christus, om aan mekaar se belange te dink.

Laat so u heilige Naam geëer word en die koninkryk van u Seun Christus kom.

Verhoor ons, o Vader, deur u geliefde Seun. Amen.

FORMULIER VIR DIE BEVESTIGING VAN DIAKENS

[Nota; Hierdie vertaling hou nie daarmee rekening dat vroue ook in die amp van diaken kan dien nie.]

Geliefdes in ons Here Jesus Christus,

U weet hoe ons nou verskeie kere die naam/name afgekondig het van ons broer(s)* wat as diaken(s) van hierdie gemeente verkies is. Die doel daarvan is om te verneem of iemand iets het waarom hy/hulle nie in sy/hulle diens bevestig mag word nie. Aangesien niemand egter enige wettige beswaar teen sy/hulle bevestiging voorgelê het nie, sal ons hom/hulle nou in sy/hulle diens bevestig. Vir hierdie doel moet u broer(s)* wat bevestig word, en ook almal wat teenwoordig is, eers uit die Woord van God 'n kort uiteensetting van die instelling en die ampswerk van die diakens aanhoor.

'n Diens om die gemeente as een gemeenskap in Christus te laat lewe, het spoedig in die apostoliese kerke nodig geword¹⁵⁷. Hierdie diens word duidelik onderskei van die diens van die Woord en gebede asook van die diens van regering¹⁵⁸.

Ons glo dat Christus mense tot besondere dienste in sy kerk roep om die gelowiges vir hulle dienswerk toe te rus tot opbouing van die liggaam van Christus. Daarom rus Christus hulle ook toe met die gawes wat hulle nodig het. [DIE Deputate moet daarop let dat in die Formulier vir die bevestiging van diakens daar 'n paragraaf uitgeval het na die paragraaf wat eindig met die woorde "diens van regering".]

As diaken(s), geliefde broer(s)*, word u geroep om sorg te dra dat die gemeente hulle eenheid in Christus met praktiese onderlinge liefde beoefen. U moet ook toesien dat die gelowiges aan almal goed doen, sodat die liefde van Christus op hierdie manier duidelik kan word.

¹⁵³ Hebreërs 13:17.

¹⁵⁴ Romeine 12:8.

¹⁵⁵ 2 Korintiërs 9:7.

¹⁵⁶ Efesiërs 4:2.8

¹⁵⁷ Handeling 2:42, 44-46; Handeling 4:32-37; Handeling 6:1-4.

¹⁵⁸ 1 Timoteus 3:2, 8; Filippense 1.

Saam met u medediakens moet u almal besoek en hulle aanspoor om praktiese liefde teenoor die medegelowiges en alle mense te bewys.

U moet deur elkeen te besoek sorg dra dat nie een deur armoede, eensaamheid, ouderdom, siekte of om ander redes van die geloofsgemeenskap vervreem raak nie.

U moet ook die middele wat gegee word tot diens van die wat in nood verkeer, sorgvuldig beheer, met wysheid bestee en met vertroosting uit die Skrif uitdeel.

Sodoende moet u Christus, u medegelowiges en alle mense dien, die gemeente tot diens toerus en die liefde van Christus tot verheerliking van God in die wêreld laat skitter.

U het gehoor wat u opdrag is. Ons vra u nou om opreg op die volgende vrae te antwoord:

Is u in u hart daarvan oortuig dat u wettig deur die gemeente van God en daarom deur God self tot hierdie heilige diens geroep is?

Glo u dat die Heilige Skrif die Woord van God is en dat dit die volmaakte leer van die saligheid bevat, en verwerp u alle leringe wat daarmee in stryd is?

Belowe u om u Goddelike opdrag getrou en met ywer in ooreenstemming met hierdie leer uit te voer en volgens hierdie leer te lewe?

Belowe u om u aan die kerklike vermanings en tug te onderwerp as u miskien in leer of lewe afwyk?

Hierop vra die bedienaar:

N, wat is hierop u antwoord?

*Hierop moet hy/*hulle antwoord:*

Ja.

Daarop moet die bedienaar sê:

Mag die almagtige God en Vader u sy genade skenk om in hierdie diens getrou en vrugbaar werksaam te wees!

*Verder moet hy hom/*hulle sowel as die hele gemeente soos volg vermaan:*

Wees dan toegewyd in u diens. Stel vas wat die nood van die gelowiges is, en kom hulle te hulp. Spoor almal tot mededeelsaamheid aan. Wees versigtig in die besteding van die middele wat aan u sorg toevertrou is.

Wees getrou in u diens en wees ('n) goeie voorganger(s) vir die hele gemeente¹⁵⁹. So sal u vir uself 'n eervolle plek in die gemeente verwerf en groot vrymoedigheid in u geloof in Christus verkry en na hierdie lewe in die vreugde van die Here ingaan¹⁶⁰.

~~En~~ U, geliefde gemeente, ontvang hierdie man(ne)* as dienaar(s) van God.

Laat u, in die beoefening van die gemeenskap van die heiliges, deur die diakens lei¹⁶¹. Gee sonder bybedoelings en dwang, want God het mense lief wat blymoedig gee¹⁶². Doen u daaglikse werk getrou, sodat u ook hulle kan help wat behoefte het¹⁶³.

Dink aan die diakens in u gebede.

~~Maar~~ Omdat ons dit uit onself nie kan doen nie, laat ons die almagtige God aanroep.

Gebed

Ons Vader,

Ons dank U dat u hierdie man(ne) deur u Gees gelei het om die roeping op te volg. Ons bid U, gee aan hom/hulle steeds meer die gawes wat hy/hulle nodig het om sy/*hulle diens te verrig. Skenk aan hom/hulle wysheid, skerpsinnigheid, onderskeidingsvermoë en liefde. Verleen hom/hulle genade om getrou in die diens te volhard en nooit deur teleurstelling, moeite, verdriet of vervolging van die wêreld te verslap nie.

Seën, Here, die gemeente waaroor u hom/hulle gestel het. Voorsien die gemeente genadig van die nodige middele om rijk te kan wees in vrygewigheid en alle goeie werke. Leer ons, deur die liefde van ons Here Jesus Christus, om aan mekaar se belange te dink. Laat so u heilige Naam geëer word en die koninkryk van u Seun Christus kom. Verhoor ons, o Vader, deur u geliefde Seun. Amen.

¹⁵⁹ 1 Timoteus 3:13.

¹⁶⁰ Matteus 25:21, 2.3.

¹⁶¹ Romeine 12:8.

¹⁶² 2 Korintiërs 9:7.

¹⁶³ Efesiërs 4:28